

asschen / mach darmit ein laugen / las sie wol an dem
asschen sieden / seyge sie durch ein tuch / vnd zwabe
das har darmit.

Ein anders darzu.

Nach dem zwahen / so das har truckt / netz es wid
der mit essig da die milben sein / so fallen sie vom kenz
men hyndan.

Das har zuuertreiben das keins wachsse.

Nym der Egelu sanguisuge genant / lege sie ynn ein
hafen / brenne sie zu puluer auffss kleinst so du magst /
wo du denn har ausreuffest / vnd das puluer hyn rei-
best / da wechst nymmer har.

Ein anders / das har zuuertreiben.

Nym newen kalck / der nie nass worden sey / derre
den gar wol ein nacht ym ferrer / nym denn Turpigi-
mentum darzu / vnd las es mit einander fast wallen /
wiltu versuchen ob es gesotten sey / so stos ein ranche
fedder darein / wird sie nicht blos / so las lenger sieden
bis die fedder blos wird / wo du das hyn streichst / da
wird es glat wie ein glas.

Ein anders.

Streich schnecken blut an / da wechst kein har / od-
der nym Salicy vnd roten essig / stos die zusammen vnd
streichs an die stat.

Ein anders.

Nym die gallen einer fledermaus / vnd von einer
gays odder ziegen / stos die vntereinander vnd streichs
an die stat.

Gelbs schöns har zu machen.

Puluer kraut thorsen / vnd thus ynn die laugen vnd
zwabe dein har darmit.

Das dir nymmer har wechst.

Nym rintfleisch vnd las gantz erfaulen / das es vol
ler würm wird / die selbigen würm lege denn ynn ein
Agrest / nym sie heraus vnd trucken sie an der sonnen /
darnach